

Headlines

1. गृह मंत्री अमित शाह होरें जम्मू-कश्मीर च बने दे सुरक्षा हालात दा कल जायजा लैता ते आखेआ जे आतंकवादी खतरें गी मिंदने लेई सुरक्षाबलें गी अगगे बी पूरी खुल्ल दिती जाहग।
2. जम्मू-कश्मीर विधानसभा दा 9वें दिनें तगर चलने आहला चौथा इजलास औंदी 23 अक्टूबर थमां शुरु होग ते एहदे च कुल 6 बैठकां लाइयां जाडन।
3. समाज कल्याण मंत्री सकीना इतू होरें केन्द्री महिला ते बाल विकास मंत्री हुंदे आसेआ सक्षम आंगनवाड़ी ते पोषण अभियान दे दुए चरण दी अमल-आवरी लेई लाई गेदी वर्चुअल बैठका च हिस्सा लैता।
4. खेड्ड मंत्री सतीश शर्मा होरें युवा मामलें ते खेड्डे सरबन्धी केन्द्री मंत्री हुंदे कन्नै मिलियै जम्मू-कश्मीर च खेड्ड ढांचे गी तगड़ा बनाने ते नौजवानें दी शमूलियत जकीनी बनाने लेई होर मती मदाद ते सैहयोग दी मंग कीती।
5. जम्मू-कश्मीर सरकारें “आयुष्मान भारत प्रधानमंत्री जन आरोग्य” योजना ते सेहत योजना लेई निगरान कमेटियां खडेरियां न तांजे प्रदेश च एकडे सेहत बीमा कार्यक्रमें दी असरदार अमल-आवरी ते इंदे कम्में च पारदर्शिता जकीनी बनाई जाई सके।

<><><><><><>

HM Security

गृह मंत्री अमित शाह होरें कल नमीं दिल्ली च इक उच्ची सतह दी बैठक दी प्रधानता करदे होई जम्मू-कश्मीर च बने दे सुरक्षा हालात दा जायजा लैता ते आखेआ जे खिते च शांति-रमानदारी लेई खतरा पैदा करने दी कुसै बी भैडी कोशश गी मिंदने लेई सुरक्षाबलें गी अगगे बी पूरी खुल्ल दिती जंदी रौहग। इस बैठका च जम्मू-कश्मीर दे लेफ्टिनेंट गवर्नर मनोज सिन्हा, केन्द्री गृह सचिव ते इंटेलीजेंस ब्यूरो दे ड्रैक्टर हुंदे सने भारत सरकार, फौज ते जम्मू-कश्मीर प्रशासन दे वरिष्ठ अधिकारिणें बी हिस्सा लैता। जम्मू-कश्मीर गी आतंकवाद-मुक्त बनाने दी वचनबद्धता गी फही पक्का करदे होई शाह होरें केन्द्र शासित प्रदेश दे प्रशासन ते सुरक्षा एजेंसिणें आसेआ पहलगाम आतंकवादी हमले दे मगरा पुट्टी गेदी गैहीं दी सराहना कीती ते आखेआ जे इनें जतनें दी बदौलत जम्मू-कश्मीर दे पूरे-पराते सुरक्षा हालात गी बेहतर बनाने च बड़ी मदाद हासल होई ऐ।

<><><><><><>

JKLA Session

जम्मू-कश्मीर विधानसभा दा शरद रुतै आहला इजलास 23 अक्टूबर शा 31 अक्टूबर तगर श्रीनगर च 9एं दिनें आस्तै लगगोग। विधानसभा स्पीकर अब्दुल रहीम राथर हुंदे आसेया जारी कीते गेदे आरजी कार्यक्रम मुजब केन्द्र शासित प्रदेश दी विधानसभा दा चौथा इजलास 23 अक्टूबर गी श्रद्धांजलि दे कन्नै शुरु होग ते विदायी कम्मकाज 6एं कम्मकाजें आहले दिनें च चलाया जाग। 24 ते 25 अक्टूबर गी छुट्टियें दी घोषणा कीती गई ऐ। पैहली छुट्टी जम्मू-कश्मीर थमां राज्यसभा दियें चंडू सीटें लेई-दंडू बरे च होने आले चुनाएं दे कारण ते दुई छुट्टी- बिजन बैठक दे दिनें दे तौरा पर होग। 26 अक्टूबर गी ऐतवार पौंदा ऐ। 27-30 ते 31 अक्टूबर गी सरकारी कम्मकाज तय कीता गया ऐ जिसलै कि 28 ते 29 अक्टूबर बिलतरतीब निजी सदस्यें दे बिलें ते प्रस्तावें लेई तय कीता गया ऐ।

<><><><><><>

Jitendra ONOE Byte

केन्द्रीय मंत्री डाक्टर जितेन्द्र सिंह होरें जम्मू युनिवर्सिटी च “वन नेशन-वन इलैक्शन” युवा सम्मेलन च बोलदे होई आखेया जे मुख्य दे विकास लेई किट्ठे ते निर्विघ्न चुनां जरूरी न। उनें आखेया जे बार-बार चुनाएं दे चलदे नीतिगत गतिरोध ते संसाधनें दी बर्बादी हुंदी ऐ। प्रधानमंत्री मोदी हुंदे नजरिये पर जोर दिंदे होई डाक्टर सिंह होरें आखेया जे “इक राष्ट्र-इक चुनां” कन्नै अमले ते माली संसाधनें दी बचत होग ते कन्नै आदर्श आचार संहिता गी बार-बार लागू करने कारण विकास च औने आहली रुकावटें थमां बी बचेया जाई सकोग। उनें अगगे आखेया जे जेड़े लोक इस पैहलकदमी दा विरोध करा रदे न- ओह राष्ट्र दी भलाई दे बजाए सियासी हितें थमां प्रेरित न। मीडिया दे नुमायंदें कन्नै गल्लबात करदे होई डाक्टर सिंह होरें आखेया.....(बाईट)

<><><><><><>

Itoo WCD Meet

समाज कल्याण मंत्री स्कीना इतू होरें मुख्य भरें च सक्षम आंगनवाड़ी ते पोषण अभियान दे दुए चरण दी प्रगति दा जायजा लैने लेई केन्द्री महिला ते बाल विकास मंत्री अन्नपूर्णा देवी हुंदी अगुआई च लोआई गेदी वर्चुअल मीटिंग च हिस्सा लैता। उनें जम्मू-कश्मीर च कल्याणकारी कार्यक्रमें दी स्थिति बारे केन्द्रीय मंत्री होरें गी जानकारी दिती ते आंगनवाड़ी हैलपरें गी कम्मै पर रखने लेई योग्यता सरबन्धी अड़चनें गी खत्म करने जनेह महत्वपूर्ण मुद्दें पर लौ पाई। उनें कम्मगारें लेई फौरी तौर उप्पर फंड जारी करने- कम्मगारें गी मता मानदेय देने ते केन्द्र आसेया प्रायोजित स्कीमें गी असरदार तरीके कन्नै लागू करने लेई जम्मू-कश्मीर सरकार गी पूरा समर्थन देने दी बी गुजारिश कीती।

<><><><><><>

Karwa Chauth (Byte)

“करवा चौथ” दा त्योहार जम्मू-कश्मीर सन्नै पूरे उत्तर भारत च रिवायती उत्साह कन्नै मनाया जा रदा ऐ। सुहागन महिलां अपने पति दी लम्मी उमर ते सेहत दी कामना करदे होई अज्ज पूरा दिन बर्त रखिदयां न। चन्न गी दिखने ते अनुष्ठान पूरा करने दे परैन्त महिलां अपना बर्त पोआरदियां न। कल संजा शैहरें ते कस्बें दे बजारें च बड़ी मती भीड़ दिक्खने गी लब्धी कीजे महिलायें- चुड़ियें-सौन्दर्य प्रसाधनें ते रिवायती टल्लें दी खरीददारी कीती। आकाशवाणी समाचार कन्नै गल्लबात करदे होई केई महिलायें अपने विचार सांझे कीते ते आखेया.....(बाईट0

<><><><><><>

Sports Min Meet

युवा सेवाएं ते खेड्डें दे मंत्री सतीश शर्मा होरें नमीं दिल्ली च केन्द्री खेड्ड मंत्री डॉ. मनसुख मांडविया हुंदे कन्नै मलाटी करियै जम्मू-कश्मीर च खेड्डें दे बुनियादी ढांचे गी बधाने बारें चर्चा कीती। शर्मा होरें इक तफसीली ज्ञापन पेश कीता जेहदे च आलमी सतह दिएं खेड्ड सुविधाएं दे विकास, हर मौसम च सहूलतें कन्नै युक्त जिला स्टेडियमें दे आधुनिकीकरण ते पंचैती स्तर पर खेड्ड सुविधाएं दी स्थापना लेई सहयोग देने दी गुजारिश कीती गेई तां जे ग्रामीण नौजवानें गी उचित पुज्ज उपलब्ध करोआई जाई सकें। उनें खेलो इंडिया पैहलकदमी तैहत 103 करोड़ 82 लक्ख रपे तौले जारी करने दी बी गुजारिश कीती। शांति, एकता

ते एकता गी बढ़ावा देने च खेड्डे दी भूमिका पर जोर दिंदे होई सतीश शर्मा होरें आखेआ जे जम्मू-कश्मीर अपनी खेड्ड यात्रा च इक महत्वपूर्ण मोड़ पर ऐ।

<><><><><><>

SEHAT Schemes

जम्मू-कश्मीर सरकार नै “आयुष्मान भारत प्रधानमंत्री जन आरोग्य” योजना AB PMJAY सेहत बीमा कार्यक्रमें दी असरदार अमलावरी लेई इक समीति दा गठन कीता ऐ। इस कमेटी दी अगुआई जम्मू दे सेहत सेवाएं सरबन्धी ड्रैक्टर- बक्ख-बक्ख जिलें दे मुख्क मैडिकल अफसर ते रियासती सेहत एजेंसी दे अधिकारी शामिल होगन। एहदी प्राथमिकता जिम्मेदारियें च इनें दवें सेहत स्कीमें दे संचालन दी समीक्षा करना-लाभार्थियें गी असरदार सेहत सेवा उपलब्ध करोआने गी यकीनी बनाना ते सरकार गी नियमित तौर उप्पर प्रगति बारे जानकारी उपलब्ध करोआना शामिल होग।

<><><><><><>

GST Ramban (Byte)

आम लोकें गी इक बड्डी राहत दिंदे होई केन्द्र सरकारें, पिच्छले म्हीने दी 22 तरीक थमां लागू कीती गेदी जीएसटी दिएं नमिएं दरें तैहत मती सारी दोआइएं पर जीएसटी दी दर गी 12 फीसद शा घटाइयें 5 फीसद करी दिता गेआ ऐ। प्रदेश दे होरनें हिस्सें आडर गै जिला रामबन च बी दोआइएं-औषधिएं दे नियंत्रण सरबन्धी विभाग आसेआ दोआइएं दे भाएं च कटौती दी सख्ती कन्नें अमल-आवरी जकीनी बनाई जा करदी ऐ। केन्द्र सरकार दी इस गैह कन्नें मरीजें पर माली बोझ घट्ट होने दी मेद ऐ। इस सरबन्धे च आकाशवाणी समाचार कन्नें गल्ल करदे होई रामबन दे असिस्टेंट कन्ट्रोलर ड्रग संजीव कुमार गुप्ता होरें आखेआ..... (बाईट)

<><><><><><>

Police Judo Cluster

जम्मू-कश्मीर पुलिस आसेआ आयोजित 10मीं कुल भारती पुलिस जूडो कलस्टर प्रतियोगिता कल्लै थमां श्रीनगर च शुरू होई गई ऐ। एह प्रतियोगिता औंदी 16 अक्टूबर गी संपन्न होई जाहग। एहदे च बक्ख-बक्ख राज्य पुलिस संगठनें, केन्द्र शासित प्रदेशें ते केन्द्री थेह्ारबंद पुलिस बलें दे दस्तें गी दर्शाने आहले 2 जहार शा मते खड्डारी हिस्सा लैरदे न। इस प्रतियोगिता दे मुकाबले श्रीनगर दे शेर कश्मीर इन्डोर स्टेडियम ते पोलो ग्राउंड श्रीनगर च करोआए जाडन।

<><><><><><>

Traffic

जम्मू-श्रीनगर राश्ट्री जरनैली सिड़क - एनएच 44 पर अज्ज छड़ी हौली मोटर गड्डिएं गी इक बक्खी दा आओजाई दी खुल्ल दिती गेदी ऐ। इस बवस्था दे तैहत अज्ज लौहकी मोटर गड्डिएं गी श्रीनगर थमां जम्मू बक्खी औने दी इजाजत ऐ ते उंनेंगी बड्डलै 7 बजे शा 10 बजे बश्कार काज़ीगुंड आहली बक्खी दा नवयुग सुरंग गी पार करना लाज़मी ऐ। अज्ज कुसै बी गड्डी गी जम्मू थमां घाटी बक्खी नेई जान दिता जाहग। लोकें गी सलाह दिती गई ऐ जे ओह इस बवस्था दे स्हाबै गै अपनी जातरा दी योजना तैयार करन ते सुरक्षित जातरा लेई ट्रैफिक सरबन्धी नियमें दी पालमा जकीनी बनान।

<><><><><><>